

Á MESA DO PARLAMENTO GALEGO

O **Grupo Parlamentar de Alternativa Galega de Esquerda**, por medio da súa deputada **Yolanda Díaz Pérez**, ao abeiro do disposto no artigo 160 do Regulamento da Cámara, presenta a seguinte **proposición non de lei para o seu debate Plenario**, relativa á reversión do proceso privatizador do rexistro civil.

Exposición de motivos

As nefastas consecuencias da privatización do rexistro civil aí están. Co proxecto de lei de medidas de reforma administrativa no eido da Administración de Xustiza e do Rexistro Civil tenta o PP un “*novo capítulo de negocio e poder*” ao incluír no rexistro civil novas xestións, alleas ao estado civil, que serán de inscrición obrigatoria e de pago.

Da desxudialización realizada polo PSOE á privatización en marcha do PP se pon en perigo o acceso da cidadanía de maneira gratuíta a este servizo e a súa atención por persoal funcionario público. A secuencia que pretende completar esta lei en trámite completa as previsións contidas na lei 18/2014, do 15 de outubro, que rachou o acordo sobre un rexistro civil público e gratuíto con 140 anos de historia.

No afán por facilitarlle o negocio privado aos rexistradores da propiedade e mercantís a modificación da lei podería supor que o rexistro de seguros ou de actos de última vontade deixarían de ser competencia do ministerio de xustiza e cuxas certificacións teñen unha taxa que se embolsará este colectivo profesional. Outra das posibles competencias sería a da obriga da inscrición de todos os poderes tanto das persoas físicas como das xurídicas e as súas posteriores revocacións.

Así a listaxe esténdese para embolsar no peto privado entre outras a obrigatoriedade da constancia rexistral do enderezo de rexistro e a dirección aos efectos de notificacións; o cobro polo libro de familia; o devengo de honorarios para os asuntos de carácter voluntario e que respondan ao interese particular da cidadanía, así como poderes, rexímenes económicos, vecindade civil, expedientes de cambio de nome e apelidos, rexistro de parellas de feito, etc., e mesmo a posibilidade de inscrición de

calquera outro feito ou acto relativo a persoas físicas previstos noutras leis para aperturar un ronsel de taxas á cidadanía e beneficios privados inacabable.

Incluso habería unha disposición final que habilitase ao ministerio para aprobar nun prazo máximo de 3 meses dende a publicación da lei os aranceis correspondentes as funcións privatizadas do rexistro.

Semellante proxecto e intencións os fragua o PP contra o parecer dos traballadores e traballadoras deste servizo público; contra a valoración da inmensa maioría da sociedade sobre como funciona este servizo público (o Observatorio da Calidade dos Servizos Públicos na súa análise do ano 2012 indicou a valoración positiva da cidadanía nun 84%, porcentaxe superior á media dos diferentes servizos públicos); ou contra as sentenzas da UE que sinalan de xeito taxativo que os rexistradores da propiedade e mercantís non son funcionarios públicos, que deben cobrar o IVE e que o seu réxime de Seguridade Social é o especial dos autónomos, outrosí de ditaminar que os devanditos profesionais non presentan as características de subordinación e dependencia que son esenciais para que o servizo público en cuestión poida considerarse prestado por persoal funcionario da administración pública; contra case todas e todos – e a prol duns poucos amigos do presidente do goberno - teima o goberno Rajoy en privatizar o rexistro civil.

Diante deste escándalo onde o presidente do goberno faise xuíz e parte, AGE sosteirá que o rexistro civil sexa un servizo propio da administración de xustiza, cuxas prazas proveeranse entre o funcionariado dos corpos superior xurídico de secretarios/as xudiciais e ao servizo da administración de xustiza.

AGE sosteirá que a cidadanía poda presentar solicitudes e documentación para actuacións ante o rexistro civil nos xulgados de paz e outros que non sexan oficinas do devandito rexistro.

AGE sosteirá que todas as oficinas do rexistro civil sexan atendidas en exclusiva por persoal funcionario.

AGE sosteirá que todo o persoal funcionario ao servizo da administración de xustiza que preste servizo nos rexistros civís ou únicos ou nas oficinas xudiciais que realicen funcións de rexistro civil sigan a desenvolver as súas funcións respectivas con carácter definitivo.

AGE sosteirá que non se reduza o persoal funcionario que desenvolva esas tarefas nin as súas retribucións, nin que este poida ser obrigado a cambiar a súa localidade de destino.

Polo referido, o grupo parlamentar da AGE formula a seguinte proposición non de lei para o seu debate no Pleno:

- O Parlamento Galego insta á Xunta a realizar un estudo independente sobre os impactos para as persoas usuarias e para o emprego público que se derivarían derivado da privatización do rexistro que está a acometer o goberno central.
- O Parlamento Galego insta á Xunta a que se dirixa ao goberno central para que retire as previsións privatizadoras contidas no proxecto de lei de medidas de reforma administrativa no eido da Administración de Xustiza e do Rexistro Civil.
- O Parlamento Galego insta á Xunta a que reclame do goberno central a derogación das medidas privatizadoras do rexistro civil contidas na lei 18/2014, do 15 de outubro.
- O Parlamento Galego insta á Xunta a soste o mantemento do rexistro civil, e do emprego asociado ao mesmo nas súas actuais condicións, como servizo público prestado en exclusiva por persoal funcionario ao servizo da administración pública.

En Compostela, a 11 de marzo do 2015.

Asdo. Yolanda Díaz Pérez

Asinado dixitalmente por:

Yolanda Díaz Pérez na data 11/03/2015 13:53:19